

传状志

附寿文墓志

传者传其人生平之行状以传诸后也然或传其人而令人读之不胜其钦敬或不胜其愤怒者盖其所得之人有善有不善也然或传其人与其人恰肖虽久而与日月争光或与其人不类未久而仍与草木同腐者盖其传之词有工有弗工地此曾子固于欧阳永叔撰其先大父碑铭而称其畜道德而能文章盖畜道德于人之恶者必不受而铭之能文章则其词足以传后亦此意也予以山林孤陋齿又益衰奚足以称述先人而于恶者则不肯受而传之而切有效于古君子焉间尝论之士君子不克大有为于时以赏罚天下而从执笔深山以论古今人物则必有以定天下之公是公非故宁见侮于时而誓不盲昧以许人可也是故其人无可传者虽其在时与其子孙烈烈轰轰炬赫乎一世而耻为之虚美有可传者虽沈潜幽抑之士寂寞孤嫠之妇极期功强近之亲无子遗者而亦必急为之阐扬焉此子传之出于心信之所不能自己者有若是也他有传诸旧谱而为先人手泽所遗或立于丰戚友为当世名公所赠者予为之询诸故老考其轶事皆于其人生平无溢美焉读吾志者善人以有传而相劝恶人以无与而自惩未始不可为吾宗教化之一助也作传状志第八

泰卿公传

人惟德器才猷足以寿世 愚于公而信然也其服由以事父母勤力以恭厥兄遵养时晦卽寓远志于尽孝弟之日焉旋际椿树凋零埵声閤寂公内深隐恟外奋撑持作一讷言敏行创业垂统之君子其德器为何如乎公之子四人半事耕而半事读共称锡类之贤公之孙十馀秉耒而或横经尽深绳武之志孙曾颺起男妇数十人公调停尽善井井有法无敢出其范围者兼之善叔子母而蓄积丰善观机变而世情熟理宗祠事数十年社穀于以兴家纲于以振无诈无虞推忠厚以待人保族宜家无在不见公之才猷也迺花甲方周酉鸡旋梦寿固不大而家累万金祚绵四代广厦连垣悉是雕梁尽栋儿孙绕膝皆为国器掌珠后日之甲第蝉联可预卜矣无疆惟休直并寿于河山 愚又何敢无一言以寿诸梨棘

三修世谱纂修宗宪譔

奉卿公传

公讳有先册名云穀字觉贤一字奉卿我族才人也赋性聪明俨似机云敏捷宅心毫迈无殊李杜雄奇堂堂之貌款款之心其过人远矣续修清咸丰戊午谱祇期九万鹏程直凌霄汉詎识四旬骥足忽赴蓉城至今人住风微之会犹令人追思不已焉歌曰世

事分茫茫前人不见念难忘声名才智今藉甚光史第兮耀宗祊

三修世谱纂修宗宪谨撰

萼辉公传

公讳有餘字萼辉仕海公十五世孙也父讳愿珍本生父愿性祖讳惟相先世所遗产业甚微公晚年广厦二十餘间田四十餘亩皆公劳心焦思手胼足胝铢积寸累以致之者岂偶然哉公自奉薄宫室衣食惟求自适遇有婚丧之举亦惟求与家称凡可以省者无弗省也逮佐族徽矩先生重修巴修南岳丁公福主庙捐貲四十串文又佐族徽矩先生重修宗祠捐貲六十串文他如济人之急全人之婚济人之桥梁息人词讼有求助者无弗与也尤好书送季子读出人名师馆中近十年旋毕业于县立高等小学校其修金斧貲未尝丝忽吝也何慷慨若是焉尝充八甲团团绅任清咸丰己未创立团局凡任团绅者地方纠纷胥与闻之以求直公性刚方理所与者虽孤寡助之所弗与虽豪强斥之以故人莫不敬信而理族事尤不避嫌怨是非不稍迁就不惮烦劳事未平虽留连一二日弗退常以和邻睦族为务邻族有见侮者必介人以理谕之不听以义动之又不听以诚感之务使不至诉于武力与官府以达和平宁己受屈呜呼凡若此者公去后至今犹令人称道之弗衰焉公以民国十五年丙寅四月初四日卒年七十有三以明年二月

葬于源来山马形丁向原配张氏继配何氏子六志荣志再出继从兄有太志胜志定亦出继从兄有太志爵志晶孙十光勋光杏光桃光是光昌光裕光煦光新光祖光提女三长适巴邑许次适滕冲周三适巴邑向

论曰凡贤人君子之足以维持世道人心者当其在时若相忘也去后则令人思吾族当公在时亦羣相安于无事忘公力于何有及公之去而后知公之关系吾宗甚巨也兹值四修宗谱族事蜩蟪几于不可收拾望老成兮不见嗟余心其谁与语余不禁太息思公于不置云

四修世谱纂修觉非谨撰

清公正传

公庆伯祖也与余祖孝友一堂言笑宴宴也自伯祖母朱孺人张孺人先游芙蓉城余祖劝之娶不应复旗人讽之娶笑曰犹子即吾子也邓伯道岂真无儿耶视余父及叔爱爱踰于所生顾性癖爱读书尝曰无恒产不至饿死人不读书便欲俗死人也故余父及叔亲承其训命庆出人于师馆者十数年惜庆不肖未获为伯祖一吐气也然而伯祖之德深厚矣呜呼孝友慈实德也庆今日兄弟之聚顺又孰非伯祖之赐耶因含泪而引以言

族侄孙愿庆撰

愿庆公传

公浑厚人也高明磊落之身学问深沈之士性若知章才同边韶便便腹笥翼翼庄容有令人追忆焉而不能忘老谱肇修于嘉庆戊公考正历代之根本辨别源流之支派集腋成裘编修精核公独肩其任有不知费几许心血者岁辛卯三修家乘翻阅之下亲手泽之犹存欢羹墙之莫见于以知文望崇隆光祖考衍后绪宜先灵庇获而俾尔戩穀也乃子以孝行歟孙以诚朴名曾元发越颍衍瓜绵祖灵之默眷亦云至矣然非公之盛德文何以致之乎

三修族谱纂修 宗宪 譔

先考先坤府君君述

先考讳先坤府君既歿十有七年适吾黄氏四修家谱不肖觉非欲乞文于当世知言君子以垂诸后谨具列里居世次先人之性行事迹大畧如此我黄氏上世明初曰仕海公者自江西分宁偕其兄仕旻公徙来湘阴治北之新塘冲黄家寨十有八传而至府君我高大父府君讳有赏曾大父府君讳志纯大父府君讳光庆本生大父府君讳光成是生先坤府君兄弟二人府君兄弟二人府君次居二吾家世贫本生大父府君佃耕族富

户某庄业府君继之未有以出也闻府君成人后善病不肖兄弟继起食指日繁负债累累府君唯恐负人每索债者至无以应之则汗颜无地故常恶闻犬声庄前当村中要路府君砌以木石使行人他去盖欲其犬声息而心弗惊也噫其困穷可怜者若是也而府君之取诸人则以礼仪自绳无所苟尝命吾伯兄仲兄为尧于外归必检查之苟有一草一木之出于窃取必唾骂之甚则鞭撻之所谓非其义非其道一介不以取诸人者以府君事吾本生继大母曰奉甘旨未尝有一日之不然于其意者以武艺师族光益公岁时馈遗至老弗衰吾伯考府君无子命吾仲兄为之后不索其分文乳哺贄送不肖读凡八年命应童子试凡八役而薪金斧贄未尝弗备也精拳术乡无与敌者 觉非 童子时见府君病不食有日忽一少年欲试其技奔而前不自知其何以颠仆也而府吾平日待人则一团和气蔼然可亲虽妇人孺子前唯恐其获戾也自府君之歿十余年里之人往往谈及吾乡先辈忠厚长者莫不欢曰惟某先生而今无其人也呜呼此皆府君之实也不肖自十岁就外傅后侍于府君之侧曰少其于府君之行所及闻见者止此他未及闻见者甚多也府君生清道光二十六年丙午二月初六日歿于民国六年丙辰十月初六日年七十有一于其明年九月葬于船形大坟山左象鼻觜田穴艮首坤趾配曾氏生吾伯兄德华次兄德贵出后吾大伯父先干次德仕即不肖觉非也次吾弟德佐吾女弟二俱

适李孙男五人忠笃忠笏忠范忠钥忠篁曾孙男三人孝慈孝瑞孝瑞今吾伯兄仲兄皆已卽世惟不肖与弟佐幸存不肖无能进取以图显扬惟思旗贤人之文章垂先型于不朽谨泣述其梗概以俟文焉民国二十二年八月朔日不肖三子觉非 谨述

有方公传

吾族有懿卿公者讳有方字符高其人居心正直处事公平持家克俭应世克勤族有公务重事虽日夜奔走而不憚其劳族有账数出入纵朝夕收存而不辞其苦而且宗祠之修整器用之齐备与夫什物等项之检点而无一失者公皆独任其力焉故族自甲戌修谱以来四十餘年至今岁而始重修者皆公倡议之功也使为首而皆若公之培植宗祖焉则禋祀自永垂不朽矣公年七十餘犹然齿豁头童爰跋数语使后世子孙虽未见其面而翻谱目此自俨然一矍铄翁之在前矣

三修世谱纂修 奉卿撰

有伯公传

愚祖诚朴有奇格励后人成家惟以敦本耕读为怀闻人有不善私心愤激若已蹈

然道光壬辰疫甚盛 愚 门数十户皆病莫起而吾祖事生瘞死具膳烹茶书夜不休未尝稍辞其瘁而竟无染七五岁而终人咸诵之

孙宗宪撰

志章公传

吾乡黄公其国先生朴实人也早岁赤贫弃儒理家政督农桑率作无倦容以勤俭起家置良田数十亩衣食于斯植居屋十馀间鸠工庀材以身先之人谓创业难公若不经意而成之其儒人吴与公合德能成内政子四伯仲耕能绍先业叔读欲以诗书光门第而公之课读尤专当诸子就外传归省少密则督责有加尝以繁华戒其子谓汝辈读书须当务实非欲其习容止也非徒以博功名也纳履捉襟断齑画粥古人以之成名谁谓俭素中无君子乎故叔季通六业能文章恒不欲其问世云既命其三子继叔父后其季与予交数年风流倜傥慷慨重义现总谱局董其成知公义方之训有自来矣大率公为人庄重寡言笑公平浑朴不习脂韦不争华饰不屑屑与乡里争是非倘所谓诚实君子非与

世愚晚邑庠生麓樵黎光干拜撰

志玖公传

立叔浑厚人也临事鯁直勤俭罕匹起家贫寒自幼至老未尝一日改其度族间公事多经其手社穀积至数日石收放置产不稍辞劳支祖本缙公遗有大山觜墓屋田地一区自同治甲子讼后未经甲方谋积聚至数千缗起南庄公社置田数石肩荷巨任饮食常恐费冗举凡大小公事排难解纷无在不以勤俭持之纵有时人以汉霍致诚亦只自矢秉性之坚而其送读之情又有专严无比者愚兄性颇钝命游名师馆帐近三十年不获吐气殆数定然也兹幸家颇裕孙有四今岁复得曾孙七十馀而健饭如常未见瞶眊之状犹汲汲理公事秉家政云

胞侄光立宗宪 撰

徽矩公传

黄公徽矩讳宗宪志意公季子也幼读书慧甚为文自攄心得不以绳墨拘屢试不售泊如也少佐先君经理家计暇则读书不辍偶有诗文随手散佚无所藏光绪时丁亥春初公母卒戊子秋末公父又卒连遭大丧苦块尽哀蓼莪抱痛名场奔走尤不介怀善治家督率诸子或耕或商用当其材家臻少有善解纷乡邻宗族偶有争辩一言剖判相

安无事善编辑旧家谱牒简陋者多重新修纂纲举目张善建设一姓宗祠两邑神庙折旧更新輟奐尽美性坦率亲朋戾至云留从便供餐止宿丰俭随时性和易高下在心色相不着自由与偕凤追柳下性慷慨慈善公益庆弗赠遗毫不吝嗇轻重必当性好洁衣食器用不尚奢丽过于粗陋亦所不取公长孙余侄壻公仲子余姨壻公少男余妹壻一家之中三般懿谊故余每岁必数谒公公躬干肥美行动轻健年逾甲状未衰族患便血日稍平夜增剧积年调养未获有廖肌肤以之大瘦须髮以之皆白一日见余来劳以杯酒手一篇相示曰吾殆将死矣吾未了事惟吾咸亨堂事此篇记咸亨堂事将以属后人了吾事之所未了倩子一言附兹记尾以相策励可乎余曰公所记语详义尽剗切动人无用别有言也余将为公传合斯记而登之家乘亦足以昭慎重警将来公曰唯唯公以今年壬申正月卒其族属寿伯茂才主修族谱余践旧约勉为立传公配周孺人淑慎温恭人皆钦慕岁庚午三月卒于罗鸦山之新宅营下首高家觜田穴而葬焉公卒遂合葬于此民国二十一年岁次壬申秋九月姻世愚侄劲凌吴似鸿顿首拜撰

附咸亨堂记

咸亨堂何以得名余自幼读书稍长遂佐先君子经理家计时以家运不亨伯仲两

兄相继早亡而仲兄无嗣先君子命以伯氏次子先嗽与余次子先澹为之后意在三槐秀枝叶齐荣无有偏枯之患也因署其所居曰咸亨之堂自是而后国泰年丰家人萃吉田园屋宇各有增加余惟日手一编讽诵于双帋之侧非应试未尝远离光绪乙酉先君子与先母氏皆年逾七十诸子侄亦各长大始将家产两股均分以仲兄之后仍附属于伯叔两家也先君子处分家事时除提出三分坵田种二斗五升留作葬地外又提杨尾冲田一坵种二斗五升老屋门首塘下东塝田一坵种五升后又置伴三公坵上田一坵种三升计共田种五斗八升除墓田所占实存田种五斗有奇留为祀田又提杨尾冲田一坵种一斗五升两家轮种暂供诸姑姊妹之应酬后仍并作祀田嘱曰吾生以七月二十八日汝母生以七月十六日倘百岁后其以此项田租备冥赀设酒饌于七月二十八日供我二人亨祀此则咸亨堂之所以留有公田也越二年丁亥母以正月弃养明年戊子先君子又以九月弃养风木悲深遗言未冷余小子敢或忘诸自是承祭数年因七月初期秋收忙碌祀事未免潦草遂又告于先君子之灵请以其歿时致祭故今之祀事改于九月九日举行行以先人遗留之田供先人身后之祀为之后者虽甚不肖断不敢妄行变动貽地下以怨恫余经营有年每以祭馀修整两家公用器具犹有存者则生生息息不敢浪费逐年又置得孝亲田二坵一在三公坵上种三升一在大礮中过路坵下种

一斗五升非徒以此皆先人遗产不忍其散失亦思以奉先馀惠积小高大保佑后人穷乏者有以济其艰俊秀者有以勖其学则先人遗泽流及孔长比则余私衷之奢望愿以属之后人而得睹其成功者也余今年已七十多病在身爰集亲房查明已前账目并旧业计存田种八斗有奇付之后人妥善管理馨香勿替鬼不叹其馁而积累而来人得沾其波及使咸亨名义终不虚悬庶几在天之灵为之首肯民国十一年壬戌岁九月九日徽矩记

德强行述

兄德强长余十岁年二十二卒时余幼弱乌足以知其状及长就学久无成祖考徽矩公心怀焦灼尝涕泣对余言曰吾惜不复见汝兄德强矣德强方六岁随汝三叔父就塾读书颖悟异常年十二四子五经书俱能成诵且粗解大义学为文即能辞以达意字法亦端劲可喜此得于周敬夫先生教授之力居多其后游徐季枏吴似鸿两茂才之门子史诸书亦多流鉴文思大进蔚然可观年十七投本邑高级小学校肄业在校三年交卷屡超同学其他科学莫不优良毕业时知事李校长骆极加称赏予以最优等毕业证书时则民国四年乙卯之岁也明年丙辰又以秋期投入湖南广益中学校各科学业亦

皆冠羣独惜其寒假归家途中风雪感寒成疾百疗难廖竟于明年丁巳五月晦而遂不起也德强死矣方望汝之好学好德强吾心犹可稍宽而汝顾如斯也噫余闻言悚惕悲不自胜祖考之意渐解今祖考下世又一年矣回忆尔时言犹在耳呜呼余何不幸而不获亲识吾长兄之状也余亦何幸而得闻吾长兄之状于祖考也追述之餘能无悲怆嫂吴氏似鸿先生侄女也生一女而殇后以仲兄德造之子忠澣入继长兄歿后嫂以忧伤过甚旋患嗽热逾年戊午三月亦卒与长兄合葬于油榨园丙山壬向民国二十一年岁次壬申九月弟德运谨述

有位公传

公讳有位字嘉穆清诰封登仕郎忠厚传家和平处世小心谨慎其素行然也立自髫龄时见其龐眉皓首噩庄严言论不苟如聆白圭之时风度服人似饮醇醪之味每区惊为世罕其人既询之乡党宗族莫不以善行推公谓公力行孝弟德着家庭刻意修齐声闻井里于宗族以和谐处之于后嗣以诗书课之举为社正官长闻其司直诰赠封典魏阙锡以恩荣且酷望光大门第命其子若孙读书数十年垂老而犹念切于是今其曾孙已卜文章发越公忠厚之报有自来矣愚乐得于闻见钦佩已久故谨秀识之

吴节妇传

昔妇熙甫传陶节妇称陶子舫妻方氏归陶氏期年而子舫死事姑九年姑死遂屑金和水服之不死夜二鼓自投舍西水家人得其尸以面没水色如生两手持茭根甚固节固奇矣然熙甫自谓作陶节妇传李习之自谓不在班孟坚伯喈下自是陶节归事垂光简编照耀千载赫赫若昨日余四修家乘遇节妇之有贤德者则传入列女以示后而窃欢节烈之鲜其入兹读旧谱至忠系本光房源几支而得光前妻吴氏其节烈与陶方氏何相类也余为之访其家世而期功强近之亲无一存者问其母家亦传之无人盖节妇之死至今近百年矣光前以清道光十四年甲午九月初五日生卒于湖北旅次节妇之就死时亦如陶方氏为夜二鼓否家人得尸亦如陶方氏以面没水两手持茭根甚固否色如生否而节妇家微其无金可屑以服如陶方氏此不必论然节妇仅遗一女与俱死必忧其夫之似续吾不知陶方氏就死时亦如节妇忧其夫之似续否也吾于是知妇人节烈之心古今多相类者而其事固有同不同也惜余之文不熙甫若传之难与持久是则节妇之不幸也

论曰节烈多出世仕宦或巨富家岂寒微者无其人与盖家寒微而世鲜有与之传者噫荒村陋巷湮没多少贞魂矣吾于节妇尤不禁感慨系之云

周节妇传

节妇周氏巴陵人幼妇我光镬祖曰升府君以盐商积有赀产光镬生甫二十二日而孤母吴孺人治家勤俭教节妇主中饋治木棉畜鸡豚画夜无暇晷半米寸薪珍同珠玉不许有失节妇奉命惟谨罔敢陨越光镬性豪放喜交游饮酒食肉慷慨自如节妇惟恐其失母欢常规劝之再三有时泣涕以谏即触其怒驱逐之鞭撻之无怨辞无何光镬果以酒致疾卒于民国十七年戊辰八月十一日节妇痛不欲生哭失声勺饮不入口有日葬后未几予至其家节妇对予言吾夫未死每夜分自外问来拂拂有声房户割然洞开灯节昏暗遂来吾床前与共寝嘻异矣是岂妄哉盖其心思念之一诚有以致其魂之来也自是欬嗽带血饮食不进日复一日肉消骨露疲瘵困倦遂以民国十九年庚午四月二十二日死时去光镬死期有九月节妇子三先淳先训先诰女二今岁族四修家乘其长子先淳乞为传于余余惟节妇之行信可风也谨访其大畧

论曰节烈妇德之大者其名未可以假人必于其夫之亡时节自刳自缢或服金溺水以殉彼遭饮食寒暑之疾会逢其适死者未可以幸邀也然因夫之亡而忧因忧成疾以卒其殉也詎有异于自刳自缢与服金溺水者哉况其他淑行多可嘉者噫若周氏其犹古节妇之俦欤

先妣曾孺人事畧

先妣姓曾氏考讳怀德母吴氏世居新塘冲之中间曾家故贫怀德公性嗜酒不治生人产业先妣幼时卽与母吴氏综理内外一切支柱门户善治木棉纺为缕曰可尽八两织为布曰可六丈餘以故里中多雇之织者东主食以肉则舍之归遗其母而唯恐人知盖常如是也无何归我府君年二十生男德华踰二年生德贵又三年生德仁卽觉非迟十八年又生男德佐中生女三长丁桂殇次秋桂次玉梅吾家亦贫佃耕人庄业府君病黄痺春夏更甚憚劳动先妣则外理农务内操井臼夜勤纺织儿女大者牵衣小者乳抱不以之旁也先妣自奉薄簪环皆铜具衣裳俱麤布食者尽红藟或粘饭数粒而菜蔬无论也其事府君餐必进以饭家存有肉或鸡子等物必调羹汤以进送觉非读餐节米一撮聚至数升或斗餘则以之送校中未尝缺乏也备吾府君与觉非兄弟衣履未尝不完虽旧浣濯必洁补缀必鲜亲戚吉凶问遗之礼未尝阙里中之乞丐叩门残汤馀饭或豆麦红藟未尝不有以与之也乞卽与之毋稍待也茶汤则壺热炉中往来行人有渴以求之者无弗应也先妣常自称其堂曰白虎堂盖白虎噬人堂有白虎而狐狸狗彘辈未敢放肆睥睨于其侧闺门以内寂无声也吾本生继大母好独处饗自尸之先妣事之谨羹汤遇肉必进园蔬遇新必奉有病则朝夕侍侧不离继大母病革时谓先妣曰汝

善事我汝后必昌盖大有感于其心也先妣以民国十六年丁卯十一月十四日卒年七十有九以明年十月葬于船形大坟山左象鼻觜田穴与府君合墓艮首坤趾府君姓黄氏讳先坤世居新塘冲之黄家寨男德华早卒德贵出后吾大伯父先二月卒德仁清光绪甲辰县学生德佐业农孙男五人忠笃忠笏忠范忠钥忠篁秋桂之壻曰李握瑜玉梅之壻曰李護国呜呼今先妣之卒已七年矣适族四修家谱欲乞文于当世有道君子追惟一二恍惚如昨余则茫然矣尝慰问忆 觉非 十岁时甫就外傳朝出墓归稍迟则先妣倚门而望夜然一灯先妣治木棉 觉非 就读于其侧机声与书声相和也一夜 觉非 读论语里仁篇至盖有之矣句忘一盖字 觉非 慌甚先妣忧之忽一先生叩门朱廉泉茂才先辈以乞火至教之先妣乃大喜 觉非 德薄能鲜不克进取大有为于时光显之徒教授乡村终身致今先妣晚年犹寓居宗祠之西偏且饥谨荐臻甘旨有缺而奚以对吾先妣也呜呼同此覆幬中人独使觉非无能以养其母而一念及之辄不觉泪堕涕零也痛哉民国二十二年八月朔日不孝三子 觉非 泣血谨述

节母罗孺人传

节母姓罗氏巴陵人幼归我族志华先生逮事其舅有春先生姑罗孺人年二十三

生子光月逾八年生光发其明年春志华先生病发于腹延医诊治罔效节母朝夕侍奉衣不解带凡七月而卒是时光月年八岁光发甫期月姑罗孺人犹在堂两目俱瞽丧葬志华先生后田存斗餘节母时年三十其亲属有欲夺而嫁之者节母则矢志自守屏去华饰入则吞声饮泣湿枕殷襟出则抱子奉姑怡怡自若勤治木棉昧爽而起夜分始寝自奉甚薄衣食粗疏支柱门户渐有赢餘送子读娶妇李葬其姑与其殤子问遗其三党戚友各称其礼未尝弗给节母寡居之初人穀仅数石逮其墓年近百餘节母以民国元年壬子六月十五日卒年七十有二今歿二十有二年矣孙一曾孙一门户犹不失为小康云

谕曰世咸谓妇之可以节著者必年方少艾节母年已三十则寻常耳予谓年三十者虽非艳阳桃李之年而究非草木黄落之候世之妇人或青年能自持而晚节丧败不可收拾者亦不乏也节母其可风欤

四修世谱纂修 觉非 谨撰

周孺人传

孺人周氏考振扬公居新塘冲之滕冲门其先世居穆屯乡之横林塘迁滕冲门二

世矣母杜氏爱怜孺人甚笃孺人亦依依左右不忍偶离后虽嫔于黄相距未半里许归宁时日无旷久者年二十生男先漪踰二年生先澹迟十年生先济女漾贞媿贞婉贞袅贞满贞亦前后迭举儿女众多劬劳极矣孺人佐理家政精麤巨细壹以自任先鸡鸣而起后斗斜而息无一日弗然也逮事舅其国公姑吴孺人效命左右则惴惴小心低声下气惟恐其不欢疾病则朝夕侍侧有呼即应所欲莫不先备以待敬事夫徽矩公卑屈已甚或逢愠怒则循墙屏息甘受挫辱稍平复进迴眷睐诸娣姒并遇有事即躬为之不问其劳逸均否家以内衣垢浣之绽裂补之而不问其为谁羣从子女寒则衣之饥则食之暑则溷浴为之洁除疾病则亲抚循或以鸡子麦肉羹汤食之羣从俱忘其母而母孺人亦忘己非其母也自孺人之没有年族之人往往有欢而言者曰厚矣夫孺人之待我辈也谒则隆以酒浆稍病则问遗旋至也孺人之外姻多吾戚友往往相聚而言曰贤哉孺人接洽殷勤违久问劳诚慈惠也孺人周姓羣从子弟多受业吾门者岁时来前言及孺人莫不泣下谓姑母之待吾家通有无卹患难出以诚恳至第犹望吾门而不胜其眷恋也孺人以民国十九年庚午三月十一日卒年七十有七以其年十月葬高家觚田穴祔徽矩公墓右孺人昔延予教儿辈先济等读凡六年敬礼始终弗衰予尝感之今予谬编家乘其子先济乞为文以阐母德予故欣然而乐道之若此

赞曰世之论人者必其人多奇节异行谓其难能而可贵也予谓庸行人之所忽忽则鲜有济者孺人庸行而至使内外无间言若是岂非天下之至难哉

节母王孺人传

族觉人先生昔予卅角与之游长亦未尝一日离以忽一日念其母之节烈欲文以垂诸后遂相谓曰吾乡文人称为吾平作传者惟君与吴伯纯先生耳予惟伯纯先生为清名孝廉品行端文亦近古洵足为节母重 觉非 何为者敬谢再三无何伯纯先生下世觉人先生亦相继物故事遂不果今值吾宗四修家乘 觉非 谬膺纂既族中列女编为传矣节如吾母其可仍谢以不敏使终无闻乎谨次其大畧以成觉人先生之志节母姓王氏巴陵县人父虚齐公历任安徽安庆府太湖县桐城县宁国府宣城等知事母周氏诰封宜人年十八赋于归逮事其姑曾孺人祖父有位公祖姑庄孺人而皆得其欢心踰年生子先埴即觉人先生二十四夫光瑾公以癆瘵卒是时去其姑与其祖父祖姑之丧未几五年连遭三年之丧四负债累累产业销铄觉人先生年甫六岁而光瑾公寡兄弟又上无伯叔节母以一少年女子抱藐小孤儿处此衰败之家卓然自立刷其家累世奢华之习而壹归于俭约警其家奴积久疲玩之弊而一致向前家无浪费室无间人蔬果怒生猪鸡肥硕数年之间遂清还旧债购置膏腴而家道以之复振焉节母貌庄性刚

烈有丈夫气节人难犯一日仆过其前衣微相拂即怒骂而驱逐之闺门之内凜若霜晨寂无声也中年持齐戒杀朝夕焚香供佛一日来吾家与吾先妣言曰吾非佞佛以求福也盖欲以是警吾心使不萌妄念耳其平生战兢自持若是课子甚严四岁使就外傅家稍数即谴责随之长疑业于湘阴仰高书院终毕业于湖南警察学堂历任湘阴县水警署署长益阳县警察事务所第二区区官皆节母之教也节母以民国六年丁巳二月十一日卒年六有十七守节四十有三年葬本境泉水塘东塆山蟠龙形子兼癸向清光绪乙巳吾乡吴君茂才似鸿先生徐君茂才季兰先生相约地方士绅联名具其事以闻于湖南提督学院翰林院侍讲曰讲起居注官支恒荣当赐以节孝可风四字并题使县额其家中堂永垂不朽云

赞曰吾读吴殿麟王节母刘氏传称节母竟日杜门楼居每春秋佳节楼以下宗族亲姻衍衍称贺而刘氏独与其孤寂处危楼相对泣闻者莫不怜也诚苦矣然吾节母与其孤泣处一室当春秋佳节其情景庸有异耶逮学使赐额中堂人莫不荣之噫荣由于苦苦之乃所以荣也吾愿凡为节母者其惟勉自苦焉即荣有弗及而心自谦所得亦已多矣苦苦岂有负于人哉

吴太孺人寿序

昔人言女子以无才为贵意谓尚德不尚才也且言女子无才便是德意谓有才转为德累也是说也余尝疑之窃以谓德者体也才者用也女子舍德固不足以言才非才亦奚足以见德从来令妻贤母生逢不幸以一身膺艰大之投而能处之泰然以昌其家而裕共后者苦心壹志之所成就才也即德也有非建党之所可测者矣黄母吴太孺人余族姑行也年二十一归黄生子光镬未弥月而丧所天方服阕而哭其舅于时太孺人年二十六上侍衰姑下鞠幼子兢兢业业莫敢或遑更有难者自光镬之祖父以农商起家薄有资产余乡贫困罕见为贵则羣以素封目之责望颇奢太孺人善体与情因应之下门以内无勃溪门以外无齟齬盖致此良非偶也久之衰姑以疾终光镬受室抱子焉太孺人忍息肩也家事巨细尚躬理之无何光镬夫妇先后物故太孺人则复为抚其孙男三人孙女二人不遗余力书声线影同率其常北陌南阡无改其旧春秋佳日抚杖堂前叮咛琐务有见之者叹其数十年如一日也回忆同时汨罗以北故家相望一再传后卢舍田园易新主不知凡几而太孺人乃能若此才耶德耶必有能办之者矣孙男长先淳温厚和平与人无忤季先诰聪慧方读书仲先训肄业汨罗中学校为余侄婿来言曰祖母为先训兄弟苦矣先训兄弟无所图报将以先训完娶之翌日为称觴祝寿愿伯父

有以文之余维寿序非古然孝子慈孙欲藉以表彰老人之懿行其意可嘉有不容辞者爰乐得而序之俾吾乡女子胥勉为不坠其先业而先训兄弟尤有以绵其世泽于勿替也民国癸酉七月既望之九日姻愚侄吴炬顿首拜撰

雪涛公寿序

孔子曰仁者寿夫仁与寿何与而必以寿归之仁者机诈息而思虑清嗜欲寡而精神固举动有常健而不息寿不之归而谁归乎 钰尝以此验吾乡先辈之有年者无或大爽近又见姻伯黄府雪涛先生亦若是已先生之为人 钰不敢谓大有异于人然惟其不求异于人而其所以异人者反对益着而不可及始先生所后考志玖公志仁其族人总理其本支南庄公会既慎既勤得田五六十亩钱六百餘缗创立祠宇一所公没而先生继之复构横屋以大其规模亦慎亦勤合得田百数十亩钱千有餘缗又循其先人之法以岁暇时修理近乡之桥梁道路古人坟墓平时闭门不出不矜才不近名数十年勉而不倦以益其族及其秀之人先生之能推广其先人仁惠之心以求尽其仁孝之道者如此昔宋范文正公于姑苏建立义庄以贍其族人丧葬婚嫁皆有资当时以为贤先生读书三十年连不得志于有司隐居乡里而所为与文正无异文正之位而心文正之

心思以不负其先人此岂常人之所能及者其可不谓之仁矣乎或疑仁道至大孔子罕言未可以一行之善而拟之不知吾心安处即是天理仁远乎哉求之日用寻常而具足者也而何疑于先生乎 钰 因之有感于心矣盖自世运之衰也礼教不行而人品日坏浮薄之士輒违其本然之性而矜意气之雄见夫乡里长厚者流恂恂自谨不訾其不才则讥其作为于是去朴愿习文饰深匿其机而与人以难测极侈其欲而备物以不继以妄为常掉弄良善亲天下事若无不可为者及察者所行无论其大即细微者亦未见其有成也无论其久即浅近者亦未见其能守也惛然懵然或尚存而神已先泣赤何益矣其以视先生之仁厚自居充然有餘益以善其事而永其年者其得失不大相径庭矣乎此孔子以寿归之仁者 钰 特窃有味乎其言又独以仁者私窥先生之为人也先生事其所后父母生尽敬没尽哀继志述事既老益杜门不出息机诈寡嗜欲其仁固为有本者仁者之理不爽于先生之已然岂或爽于其将然乎于此尤有以征先生之后之寿之心无穷也今岁丁巳十一月念二日为先生七秋生辰今嗣含清先数日以书来具道先生之生平如前所述者且称先生虽老神明不衰属文之以为先生寿 钰 自维学识鄙陋于古人为文之道未能窥其万一何敢以不足重轻之言为先生羞顾念家于先生为姻亲又居同里闻当首有以寿先生特以频年为衣食所奔走未能抠衣晋谒聆训诲于

长者之前既有待于含清之言遂不敢以不文辞因道先生之所以事其亲以惠其族与其乡之人者而归之于仁且推论人所以克永其年之理以寿先生以谓仁者人性之所同而能保其仁者先生若独有异焉吾乡多英俊之士苟能即其所同者以求至于先生之异而后出其才与力以进益于国而退宜于家则其本同者迹可不必尽与先生同先生其以为然乎含清云先生性不喜饮酒今岭此言或且欣髯笑曰有是哉吾家居不出常恐人之迂我也今尔之为言若此其诚知我者哉当破例为浮一大白则 钰之所以寿先生者为有光荣矣敢随诸亲友后酌兕觥以俟之

姻愚侄吴 钰顿首拜祝

香彩公墓志

吾族香彩公持家勤俭处世和平德配胡孺人无非无仪内政克修故膝下五君亲承其训皆宏垂创之谋而衍瓜绵之庆其孙曾辈恭承先绪矢志箕裘莫不以光前裕后为怀于同治甲戌为两大人立王熙凤个求予序予维诚孝所动欣然乐从虽予生也远未得目亲其行实而亲其累世繁昌后人诚朴知公与母之积累绵延良有自耳爰集肤辞庶俾献交之有据敬铭盛德不同杞宋之无征覘发祥而勿替叶茂枝繁自锡祉以无

疆云梯桂折是为序

同治壬戌恩科举人宗愚晚社田介繁敬撰

日升公墓志

日升先生讳有宏曾祖洁祖惟鉴父愿成世业农先生继之以起家晚年积赀巨万其在吾乡亦富有矣而非偶然也理财有书生计有学贸易者素封且流为落魄本寒微者安所望也嗟乎先生能若是吾乡之幸福也余尝谓吾乡人家赀之涨落若与清室之盛衰相终始清室当干嘉之际政畧张边徽肃为极盛之时代而吾乡巨新塘吴氏凤凰台渡头湾两彭氏所拥家赀俱不下数十万亦可谓豪矣洎乎道咸外交屡败内政日乘国事遂渐不可为而吾乡人之居室者亦自是鲜有以富闻噫嘻富者贫者之所仰给也自是而吾乡贫人之受其影响而生意寂寥者盖已近百年矣安利用如先生者数十辈起而相与维持于不敝乎故国坵墟老成凋谢余不禁感慨系之矣德配孺人吴氏早亡无出继配孺人胡氏与先生糟糠者也温躬淑慎而于先生没后更有为人所难能者先生之子振鹏君早世遗孙光 钁 先生没时仅两岁耳妇吴氏又闺中弱质不欲以才见拥千金之产而抚孤寡若是危甚孺人独以静镇之内难不作外祸不生不啻先生之犹

存也且送饗孙读无懈志欲其以读书光大门闾也倘所谓巾幗丈夫非欤振鵬君读书人也性慷慨不寿悲夫先生女一适巴邑董今已物故先生以前清道光十八年戊戌生光緒二十三年丁酉卒寿六十岁孺人以前清道光十九年己亥生民国元年壬子卒寿七十三岁振鵬君前清同治八年己巳生光緒二十一年乙未卒年二十七合冢虎形山午子兼丁癸向

铭曰 壮哉形胜虎踞龙蟠锤灵毓秀其后必蕃天眷有德先生当焉孺人令嗣一门之贤瑞烟佳气郁苍苍诞生俊杰为宗佑光 中华民国十三年甲子六月下浣穀旦族觉非拜撰

引年公墓表

公讳光寿字引年先世曰仕海公者自江西分宁于明洪武初年偕兄仕旻公徙来湘阴县北之新塘冲黄家寨世为湘阴人父讳志辉祖讳有香工者世业农始其家固贫公为童子时即能自振拔吾乡农家粪田牛豕栏外多取足于犬之粪人每持取粪具于荒郊野草间求之公童子时虽冰夜霜晨必昧爽而起人往求之则皆有公之足迹尽无有得公之先者矣稍长力农播种耕耘收获亦一事无居人后盖具兼人之勇珍分阴之

贵故农务次第毕每先人一着也秋收后每结同人为陶之业结棚山泽中虽朔风透骨霜露蒙头朝夕从事无或辍如是者有年然终无改于其贫也无可易农而商佃我南庄公祠开设贷店十餘年间铢积寸累渐有赢餘由是置田业筑筑屋庐乃克为吾族上户盖创业若斯之难也公性慷慨遇财之当用者竟不自爱惜里中贫乏则周之废疾则养之昏丧不能举者则协助之或争田地山林而势将成讼者则暗出金排解之或有以桥梁神庙乞捐者则恺捐之无难色尤爱书尝自以不读为恨遇文士则宾礼之弗衰后进则裁成之无倦公亲属中志鏐见为吾乡名教员者因公昔抚字之教读之而有今日者也公事父母饮食必亲调汤药必亲尝待诸弟有无与通患难相卹呜呼此皆公之实行而予之所及闻见者也其未及闻见者犹甚多也公以清咸丰元年辛亥十二月二十四日生卒民国十三年甲子六月十一日年七十有四即以是年八月二十八日葬于南庄公祠下手凤形山午兼丁向东距家半里而近配甘氏生子二人先睦先诞诞出后从弟光梧孙一人德铜曾孙一人忠实呜呼今距公之去已十年矣其亲属志鏐銜公之恩欲表公之善行于墓道而乞言于予予亦尝感公之礼遇于无既者奚敢以不文拒弗应也故次其大畧以谄情来哲